

15 OCT 2002

India-Asean/I

MALAYSIA HANTAR DELEGASI TERBESAR KE SIDANG KEMUNCAK PERNIAGAAN INDIA-ASEAN

Oleh: R. Ravichandran

NEW DELHI, 15 Okt (Bernama) -- Malaysia menghantar lebih 100 anggota perwakilan kebanyakannya ahli perniagaan ke Sidang Kemuncak Perniagaan India-Asean, menjadikannya rombongan terbesar di kalangan negara anggota pertubuhan serantau itu.

Sidang kemuncak itu akan berlangsung di sini Khamis ini dan di Hyderabad, ibu negeri Andhra Pradesh, hari berikutnya.

Penolong Setiausaha Persekutuan Dewan Perniagaan dan Perusahaan India (Ficci), Shaju Mangalam, berkata penyertaan Malaysia secara besar-besaran dalam sidang kemuncak itu mencerminkan kemajuan hubungan perniagaan antara kedua-dua negara.

"Kami harap beberapa perkongsian akan terhasil daripada potensi besar perniagaan yang terdapat di kedua-dua negara dan dalam konteks Asean," katanya kepada Bernama di sini.

Perdana Menteri Datuk Seri Dr Mahathir Mohamad dijadual memberi ucapan pada sidang kemuncak itu.

Sebagai pembuka jalan bagi Sidang Kemuncak India-Asean pertama yang akan berlangsung di Kemboja pada Nov 2002, sidang kemuncak perniagaan ini bertujuan memberi peluang kepada para pemimpin perniagaan, penggubal dasar, institusi kewangan dan pelabur untuk bersua muka dan mengatur strategi perniagaan untuk kepentingan bersama.

Sidang kemuncak perniagaan ini dianjurkan bersama oleh Ficci dan kerajaan India.

Shaju berkata, India menawarkan peluang kepada ahli perniagaan Malaysia untuk melabur dalam bidang pembangunan prasarana, bioteknologi dan industri makanan.

Sebaliknya, ahli perniagaan India berharap mendapatkan peluang perniagaan dalam pelbagai bidang seperti hidroelektrik, telekomunikasi dan pembangunan prasarana di Malaysia, katanya.

Ficci, yang ditubuhkan pada 1927, mempunyai 250,000 anggota gabungan dan menubuhkan majlis perniagaan dengan 70 negara termasuk Malaysia. Ia adalah antara dewan perniagaan terbesar di dunia.

Di kalangan anggota Asean, Malaysia merupakan rakan perniagaan terbesar bagi India. Negara itu pula adalah rakan perniagaan terbesar Malaysia di Asia Selatan.

Bagi tempoh 2001-2002, perniagaan dua hala antara India dan Asean bernilai US\$10 bilion.

-- BERNAMA

RV MAM SP MAI